



Broj: 04/5-50-15-134-10-2/16
Sarajevo, 31.5.2016.

PREDMET: Izvještaj sa 61. proljetnog zasjedanja Parlamentarne skupštine NATO-a, održanog u Tirani od 27. do 30.5.2016.

U radu 61. proljetnog zasjedanja Parlamentarne skupštine NATO-a, održanog u Tirani od 27.5. do 30.5.2016., učestvovali su: Nikola Lovrinović, predsjedavajući i Asim Sarajlić, član Delegacije Parlamentarne skupštine BiH u PSNATO-a.

27.5.2016.

Održan je sastanak sekretara delegacija tokom kojeg je detaljno prezentiran plan rada, nacrt predloženih deklaracija, informacija o rasporedu rada komiteta proljetnog zasjedanja PSNATO-a.

28.5.2016.

Rad proljetnog zasjedanja PSNATO-a odvijao se prema utvrđenom planu. Prije početka rada komiteta održani su sastanci političkih grupacija Konzervativaca i Kršćanskih demokrata, Alijanse liberala i demokrata i grupacije Socijalista. Na spomenutim sastancima razmijenjena su mišljenja o temama koje su predviđene za raspravu tijekom proljetnog zasjedanja.

Delegacija PSBiH je prisustvovala zasjedanju Komiteta za civilnu dimenziju sigurnosti PSNATO-a kojim je predsjedavala predsjedavajuća **Ulla Schmidth** (Njemačka).

Na sjednici Komiteta za civilnu dimenziju sigurnosti PSNATO je obavljena rasprava o nacrtu specijalnog izvještaja o temi: „Zapadni Balkan: Izazovi europskih i euroatlantskih integracija“. Prezentovan je Izvještaj članova ovog Komiteta, koji su 8. i 9. marta 2016. boravili u radnoj posjeti Bosni i Hercegovini i Srbiji. Predmetni izvješća predstavlja viđenje aktuelnog stanja u zemljama Zapadnog Balkana.

Ulla Schmidth, specijalni izvjestilac Komiteta za civilnu dimenziju PSNATO je naglasila u svom uvodnom izlaganju da Nacrt izvješća govori o stanju u zemljama Zapadnog Balkana te da će se o njegovom konačnom obliku izjasniti sudionici Godišnjeg zasjedanja PSNATO koje će se sredinom novembra održati u Istanbulu. Kada je u pitanju viđenje stanja u Bosni i Hercegovini, Ulla Schmidth je pozvala BH. političare da nastave sa reformama i preuzetim obavezama. Pozitivne procese treba nastaviti jer Bosna i Hercegovina zaslužuje evropsku budućnost. Pozvala je članice NATO da pomognu Bosni i Hercegovini da sa aktivira Akcijski plan za članstvo-MAP.

Nikola Lovrinović, predsjedavajući Delegacije PSBiH u PSNATO je u svom obraćanju pred članovima ovog Komiteta vrlo jasno pozvao njegove članove da podrže Bosnu i Hercegovinu u namjeri da se aktivira Akcijski plan za članstvo MAP.

Lovrinović je prisutne podsjetio da je tijekom ministarske konferencije zemalja NATO u Talinu, 2010. godine, Bosni i Hercegovini uslovno dato da krene sa realizovanjem Akcijskog plana ako se izvrši uknjiženje 69 vojnih lokacija. U proteklih šest godina se pokazalo da je to praktično nemoguća misija jer je cjelokupan proces otišao na politički teren. Kako stvari stoje, još će se čekati na nastavak započetog procesa uknjiženja nepokretne vojne imovine.

Na ove činjenice su Lovrinović i Sarajlić ukazivali i tokom posjete Komiteta Bosni i Hercegovini, a i tokom posjete gospodina Mike Turnera, predsjedavajućeg PSNATO u novembru 2015. godine te predlagali da se uslovi koji su tada postavljeni preispitaju i ublaže kako bi se aktivirao MAP.

Nikola Lovrinović je još jedanput naglasio da je predstojeći Samit NATO u Varšavi prilika da se redefiniše zahtjev prema Bosni i Hercegovini iz Talina i da se otpočne sa realizovanjem Akcijskog plana za članstvo.

Ovaj prijedlog je obrazložio činjenicom da je početak realizovanja MAP-a potreban i za izgradnju naših Oružanih snaga i društva u cjelini.

Time se ne prejudicira odluku o ulasku Bosne i Hercegovine u NATO. Time nastavljamo sa procesom dostizanja standarda koji će omogućiti našim vojnicima da, kroz programe koje nudi NATO, krenu u jednu novu fazu reorganizovanja i opremanja.

Pripadnici Oružanih snaga BiH su to zaslužili jer su se u mirovnim misijama pod vodstvom NATO i Ujedinjenih naroda pokazali kao pozudan parter i saveznik. Početak implementovanja MAP-a bio bi znak priznanja našim vojnicima koji su se bez rezerve pokazali i saveznicom i parterom i NATO i Ujedinjenih naroda.

Lovrinović je vrlo jasno rekao da u našoj zemlji postoje različita viđenja oko ulaska u NATO. Odluka o članstvu u NATO očito ostaje neriješeno pitanje, ali ne i nemoguć cilj.

„Ne trebamo ignorisati činjenicu da je Parlamentarna skupština BiH 2008. godine donijela Rezoluciju o spremnosti Bosne i Hercegovine za NATO integracije, da je Predsjedništvo BiH isto tako donijelo odluku u junu 2009.godine da aplicira za MAP. U obje ove institucije su predstavnici svih naroda i najbrojnijih političkih partija i stranaka, kojima je narod dao povjerenje na izborima i te odluke ne treba ovoga momenta preispitivati i ignorirati. Naprotiv, trebamo ih ponovo aktuelizirati i krenuti dalje.“-naglasio je Nikola Lovrinović, predsjedavajući delegacije PSBiH u PSNATO.

Članovi Komiteta su podržali izvještaj Ulle Scmidth.

29.5.2015.

Članovi Delegacije PSBiH učestvovali su u radu Komiteta za odbranu i sigurnost PSNATO.

Komitet za odbranu i sigurnost PSNATO-a kojim je predsjedavao **José LELLO** (Portugal), predsjedavajući, razmatrao je:

-Značaj implementovanja zaključaka NATO Samita iz Velsa i implementiranja Deklaracije PSNATO o pripremi predstojećeg NATO Samita u Varšavi

-Uloga NATO u budućem konceptu razvitka pomorskih snaga i kapaciteta u borbi protiv pirata na moru

-Podrška NATO u održavanju dalje stabilnosti u Afganistanu.

Članovi Delegacije Bundestaga u PSNATO organizovali su sastanak sa delegacijama zemalja Zapadnog Balkana. Domaćin sastanku je bio dr. Karl A. Lamers, predsjedavajući Delegacije Bundestaga u PSNATO i bivši predsjedavajući PSNATO.

U svom obraćanju učesnicima sastanka posebno je insistirao na regionalnoj saradnji zemalja Zapadnog Balkana te na otklanjanju prepreka za početak implementacije MAP-a za Bosnu i Hercegovinu.

U nekoliko navrata je podcrtao spremnost članova Bundestaga da pomognu Bosni i Hercegovini na njenom europskom i euroatlanskom putu. Insistirao je na pomacima koji trebaju biti vidljivi bar u nekom od segmenata. U tom slučaju pomoć SR Njemačke neće izostati.

30.5.2016.

Na plenumu Proljetnog zasjedanja Parlamentarne skupštine NATO-a (PSNATO) u Tirani, usvojena je Deklaracija u kojoj zemlje članice PSNATO, uoči predstojećeg Samita NATO-a u Varšavi, daju punu i nedvosmisleni podršku Bosni i Hercegovini u njenim naporima da aktivira Akcioni plan za članstvo (MAP) i u kojoj se zemlje članice NATO-a pozivaju da našu zemlju podrže i pomognu joj na njenom europskom i euroatlanskom putu.

Tokom obraćanja učesnicima proljetnog zasjedanja PSNATO, predsjedavajući PSNATO Michael Turner pozvao je zemlje članice NATO-a da pomognu BiH da još snažnije nastavi započete reforme na euroatlanskom putu. Turner, koji je član Kongresa SAD, pozvao je bosanskohercegovačke političare da učine sve kako bi se MAP aktivirao što je prije moguće. "Građani BiH zaslužuju našu podršku", poručio je Turner.

Svi učesnici opšte rasprave na zasjedanju PSNATO u Tirani, među kojima su bili i predsjednik Parlamenta Albanije Ilir Meta, premijer Albanije Edi Rama, predsjednik Vlade Crne Gore Milo Đukanović i zamjenik generalnog sekretara NATO-a Alexander Vershbow, snažno su podržali europski i euroatlanski put BiH, te pozvali vodeće političare u našoj zemlji da vrijeme pred nama iskoriste kako bi napravili dodatni reformski zamah u postizanju vanjskopolitičkih ciljeva za koje postoji jasno opredjeljenje.

Tokom zasjedanja PSNATO podržan je napredak koji zemlje Zapadnog Balkana imaju na europskom i euroatlanskom putu, a lideri tih zemalja pozvani su na jačanje međusobne bilateralne i regionalne saradnje.

PREDSJEDAVAJUĆI DELEGACIJE
Nikola Lovrinović

Prilozi:

- Izlaganje Nikole Lovrinovića, predsjedavajućeg Delegacije PSBiH u PSNATO na zasjedanju Komiteta za civilnu dimenziju PSNATO-a